

四庫全書

子部

欽定四庫全書

子部  
通雅卷三十三

詳校官中書臣朱文翰

員外郎臣牛稔文覆勘

總校官降調編修臣倉聖脉

校對官中書臣高 中

謄錄監生臣閻學朱

欽定四庫全書

通雅卷三十三

明方以智撰

器用

古器

古器有款識謂其有窾而可識也山文葉文雲雷鈿窠  
綰綽篆識皆款識也卮言曰款是陰字凹入者識是  
陽字挺出者此因博古圖之說也博古圖又云款在外  
識在內夏器有款有識商器無款無識識音熾智按始  
于爾雅鼎款足謂之鬲史封禪書汾陰巫錦培視得鼎

大異于衆鼎文鏤無款識注師古曰款刻也識記也說文說從窾省毛氏曰從出省從土作款今作款本象出氣紆曲因以宥脅加穴為窾而識款因之然古通也莊子導大窾又用款啟寡聞之人即窾脅也司馬遷傳實不中其聲者謂之款注空也後人因此見器之形製謂之款樣蓋謂其有款而可識凹凸附會之說也井觀瑣言曰宣和博古圖天子好之童蔡逢迎之幾何不偽古器仰曰山文俯曰葉文因山文向上葉文垂下而立此

名也雲回相綰綽古銘借其義用祈綰綽後人謂其地  
曰鈿窠或又分花紋為款篆刻為識皆因形分立之名  
古器謂之匱辯之者固有其道也 說文匱古器也呼

骨切箋曰今謂骨董即匱董之訛也九成引張子賢曰  
辯古器則有所謂款識臘茶色朱砂斑真青綠井口之  
類方為真古其製作有雲紋雷紋山紋輕重雷紋垂花  
雷紋鱗紋細紋粟紋蟬紋黃目飛廉饕餮蛟螭虬龍麟  
鳳熊虎龜蛇鹿馬象鸞夔犧雉鳧雙魚蟠虺如意園絡

盤雲百乳鸚耳貫耳偃耳直耳附耳挾耳獸耳虎耳獸

足夔足百獸三螭樾草瑞草篆帶若糾結之勢星帶四旁飾以星象

輔乳鐘名用以節樂者碎乳鐘名大乳三十六外復有小乳周之立夔雙夔之類

凡古器制度一有合此則以名之如雲雷鐘鹿馬洗鸚

耳壺之類是也如有款識則以款識名如周叔液鼎齊

侯鐘之類是也古器之名則有鐘大曰特中曰編小曰編鼎尊壘

彝舟類洗而有耳卣音酉又音由中尊器瓶爵斗有耳有流有足流即

也甯卮觶之鼓切酒觴也角類彝而無柱栝敦簠其形簠類鼎而矮蓋有四足豆

甌牛偃切無底甌也錠徒徑切又都定切竿觚形製同昂漢志謂空足曰昂鍍宥才

切玉篇云似釜而大盃戶戈切又胡卧切盛五味之器其實類小瓮而有環也似昂而有蓋有甬有執攀

壺其類有四曰員曰區曰方曰盂盥於含切覆蓋也似洗樣甌蒲後切

矮鋪薦類豆鋪陳薦獻之義罍釜類盛水器上方如斗鏤底匱代支

盤洗盆銷呼玄切類洗玉杆磬鐸鐸鉦類鐘鏡戚鍍鐸

柄飾物奩鏡即節鉞戈矛盾弩機表坐旂鈴刀筆杖頭蹲

龍宮廟乘輿之飾鳩車兒戲提梁龜蛇硯滴車輅托轅

之屬此其大槩趙希鵠洞天清錄集古鐘鼎彝器辨云

夏尚忠商尚質周尚文其制器亦然商器質素無文周器雕篆細密此固一定不易之論而夏器獨不然余嘗見夏琫戈于銅上相嵌以金其細如髮夏器大抵皆然歲久金脫則成陰窵以其刻畫者成凹也銅器入土千年純青如鋪翠其色于後稍淡午後乘陰氣翠潤欲滴間有土蝕處或穿或剝並如蝸篆自然或有斧痕則是偽也銅器墜水千年則純綠而瑩如玉未及千年綠而不瑩其蝕處如前今人皆以此二品體輕者為古不知



器大而厚者銅性未盡其重止能減三分之一或減半  
器小而薄者銅性為水土蒸淘亦盡至有鉏擊破處並  
不見銅色惟翠綠徹骨或其中有一線紅色如丹然尚  
有銅聲傳世古則不曾入水土惟流傳人間色紫褐而  
有硃砂斑甚者其斑凸起如上等辰砂入釜以沸湯煮  
之良久斑愈見偽者以漆調朱為之易辨也三等古銅  
並無腥氣惟上古新出土尚帶土氣久則否若偽作者  
熱摩手心以擦之銅腥觸鼻偽古銅器其法以水銀雜

錫末即今磨鏡藥是也先上在新銅器上令勻然後以  
醃醋調細礪砂末筆蘸勻上候如臘茶面色急入新汲  
水滿浸即成臘茶色候如漆急入新水浸成漆色浸稍  
緩即變色矣若不入水則成純翠色三者並以新布擦  
令光瑩其銅腥為水銀所匱並不發露然古銅聲微而  
清新銅聲濁而閑不能逃識者之見薛尚功款識法帖  
及廣鐘鼎韻宣和博古圖呂大臨考古圖王球嘯堂集  
古錄黃睿東觀餘論董道廣川書跋等書皆當熟味徧

參而斷之以經庶可言精鑒也今宣銅鑪永成宣嘉之  
窑器果園廠漆器宮川扇蘇金扇鏤版之書北源腐芥  
之製皆精于古

得董得鞞即得寶也匱董之原也 郭朝請曰唐引船

歌曰得董紇那邪紇那得董邪河裏船車夷

即關字  
見玉篇揚

州銅器多得董之得音丁紇反又按唐玄宗幸望春樓  
觀韋堅新潭陝尉崔成甫錦半臂缺胯綠衫褐之紅陌  
首居前船唱得寶歌胡身之注曰先是俚歌曰得體紇

那邪其後得寶符于桃林成甫乃更紇體歌曰得寶歌  
又按計有功唐詩紀事作紇囊得體邪體音都童反則  
得體即得董又按太真外傳敘此事曰製曲曰得寶子  
又曰得靺靺方孔反考字書絕無靺字恐是鞞字乃琫  
之俗文因思鞞董聲近觀成甫因得董為得寶可知唐  
人方言呼寶為鞞而得董紇那之音即今骨董二字之  
原靈贍討賀莫達干立黑姓骨咄則此語從外國來唐  
宋小紀又有骨篤犀故轉為骨董而說文有匱字古器也

其唐人所附乎指南引名物考言惠州有骨董羹則鵲突羹耳南齊書扶南傳遣那伽仙獻瑠璃蘇釭二口或曰釭即靺然無據或曰篋撈轉為搜拉之聲御覽載林邑記蘇釭音正乃立之訛

古以鼎為重器本象作𩺰 伯厚似孫詳載諸名升菴抄之無所考辨元美元瑞俱未有定論茲約存其槩耳別集諸公辯難自為一目以備參考子華子黃帝采銅首山鑄神鼎曹植有黃帝三鼎贊墨子夏后鑄鼎四足

而方說文禹鑄鼎荆山之下帝王世紀在馮翊懷德之  
南史記武王命南宮括史佚展九鼎寶玉威烈王二十  
三年九鼎震後漢郡國志雒陽東城門名鼎門九鼎所  
從入唐志許康佐九鼎記四卷書目陳太子中庶子鹵  
荔撰鼎錄一卷錄自古鼎形象款識始于夏九鼎終于  
王羲之書鼎崔駰達旨注蔡邕銘論曰呂尚作周太師  
封于齊其功銘于昆吾之鼎墨子耕篇夏后開使飛廉  
鑄于昆吾使翁難雉乙卜于白若之龜龜曰鼎成四足

而方不炊而自亨不舉而自藏不遷而自行乙又言兆  
之繇曰饗矣逢逢白雲一南一北一東一西九鼎既成  
遷于三國鼎錄太公于渭水得玉璜鑄一鼎刻其文曰  
璜鼎外紀及說苑呂覽湯時大旱翦髮斷爪身嬰白茅  
禱桑林持三足鼎楚詞天問緣鵠飾玉注伊尹修飾玉  
鼎以事湯智按此因伊尹負鼎于湯而附會此說論詳  
別條淮南周鼎鑄倕使銜其指明大巧之不可為也呂  
氏春秋周鼎著饗餐有首無身周鼎著鼠令馬履之為

其不陽也明堂位崇鼎貫鼎大璜封父龜天子之器也  
周膳夫注牢鼎九陪鼎二左傳昭七年晉賜子產莒之  
二方鼎金石錄有方鼎銘藏岐山張舜民云夏時器也  
服虔云鼎三足則員四足則方呂氏春秋齊攻魯求岑  
鼎魯君載他鼎以往齊侯弗信史記秦武王與孟說舉  
龍文赤鼎韓非子齊伐魯索讒鼎魯人以其雁往謂贗  
也智按此即呂覽岑鼎一事他如正考父鼎部鼎齊甲  
父鼎吳壽夢鼎晉刑鼎衛舒鼎見左傳衛孔悝鼎銘見



祭統鼎錄蕭何為丞相鑄一鼎大如三石甕自表已功  
郊祀志夏六月汾陰巫錦為民祠魏雎后土營旁見地  
如鉤狀掇視得鼎迎至甘泉至中山晏溫有黃雲有庶  
過議尊寶鼎東方朔傳夏育為鼎官宣帝時美陽得鼎  
獻之神爵元年為周康寶鼎立祠未央宮中明帝永平  
王雒山出寶鼎廬江太守獻之東觀記廬江獻鼎詔召  
鄭眾問齊桓公之鼎在柏寢臺見何書春秋左氏有鼎  
事幾眾對狀除郎中郡國志汝南桐陽注皇覽曰永平

中葛帔城北祝里社下于土中得銅鼎而銘曰楚武王之冢竇憲傳南單于遺獻古鼎容五斗旁銘曰仲山甫鼎橋玄三鼎東鼎銘建寧二年八月丁丑延公入于玉堂前廷為司空中鼎銘曰四年延公登于玉堂前為司徒西鼎銘曰光和元年延公入崇德前殿為太尉晉成帝咸和元年宣城春穀縣山岸摧獲石鼎咸康八年廬江春穀縣留珪夜見光取得玉鼎元嘉十三年武昌縣章山出神鼎江州刺史南譙王義宣以獻二十一年新

陽獲古鼎有篆書四十二字雍州刺史蕭思話以獻泰  
昭五年南昌獲古銅鼎容斛七斗王景文以獻七年義  
陽獲銅鼎吳赤烏寶鼎出臨平湖又出東部鄆縣南齊  
永明二年丹水上下得古鼎一枚唐貞觀二十二年涇  
水獲古鼎開元十三年萬年人王慶築垣獲寶鼎五獻  
之二十一年眉州獻寶鼎縣本汾陰開元十年獲寶鼎  
更名冊府元龜云獲古銅鼎二其大者容一斗咸平三  
年乾州獻古銅鼎句中正與杜鎬詳其文曰維六月初

吉史信父作鸞甌期萬年子子孫孫永實用宋祥符五年南康軍獻古鼎皇祐五年鑄鼎十有二員丘用五宗廟七又作鸞刀命阮逸胡瑗鑄劉敞為新律鐘鼎鸞刀銘崇寧三年以魏漢津言鑄鼎中曰帝鴈八方曰蒼彤晶寶魁阜壯風上為鴈銘帝鴈曰隆鴈八鼎曰育明藏正健順蘇潔宣和元年安州得商六鼎上之大觀三年以鑄鼎之地作寶成宮寶籙宮神霄殿遂為十八鼎博古圖歷代之鼎形制不一有腹著饗餐而間以雷紋者

父乙鼎之類是也有鍊色如金著飾簡美者辛鼎癸鼎之類是也有緣飾旋花奇古可愛者象形鼎橫戈父癸鼎之類是也有密布花雲或作雲雷迅疾之狀者晉姜鼎雲雷鼎之類是也有隱起饗餐間以雲雷或作細乳者亞虎父丁鼎文王鼎王伯鼎之類是也或如孟鼎之侈口中鼎之無文伯碩史頤鼎之至大金銀錯雋之絕小或自方如簠或分底如鬲或設蓋如敦曰崇曰貫則名其國也曰讒曰刑則著其事也曰牢曰陪則設之異

也曰神曰寶則重之極也智以讒與饒通或作岑可知其借矣宣德銅爐最貴濾十二次鎔于鋼格滴格下者鑄爐餘作他器初做宋燒斑已用蠟茶本色或栗筍棠梨褐而末以淡勝其款皆備以乳足戟魚耳為雅色若藏經紙而橘皮發光畜火愈妙彩爛善變不似青綠鼎彝之安銀膽也真適用之神品哉

尊手舉酋也 周禮疏彝尊同是酒器盛鬯者為彝盛酒者為尊堯衢尊虞泰尊夏山罍殷著尊周犧尊著無

足之尊也周有六尊六彝夏琖殷斚周爵夏雞夷龍勺  
殷疏勺周黃目蒲勺夏樽周又有兕觥大尊山尊大壘  
瓢齋修概散瓢齋甘瓠割去抵以齊為尊修概散皆漆  
尊也詩稱金壘束皙引周公流水汎酒逸詩羽觴隨波  
魯有四代尊博古圖有父乙祖乙祖丙父戊祖己已舉  
爵商觚十六商觶三周乙舉尊觶謂之舉也犧象尊全  
作犧牛形而開背為尊鄭阮之謬灼然矣鳧尊瓢尊夔  
龍尊犧首壘素犧壘象首壘周尊一十五又有著尊壺

尊龍鳳方樽蓋商器也漢桂尊秦尊梁孝王有罍

即尊

高紀奉玉卮古作觥師古曰觥飲酒員器也博古圖有

漢建光卮銘曰建光中室有四又漢犧首杯瓠斗螭首

卮雲雷卮蟬紋卮又有漢虎竿高克尊銘師觥尊銘穆

卮銘曰是寶尊彝子象之子洪作旅卮王錫賓朋用作

母乙彝梁劉之遴獻古器四種于東宮其一鏤銅鷓夷

榼二銘曰建平二年造二金銀錯鏤古樽二篆銘曰秦

容城侯適楚之歲造與元封龜茲澡灌初平澡盤為四



智按龜茲豈知漢篆此器之偽明矣齊劉悛于司州得古禮器銅壘瓶幽山銅壘樽銅定鐘各二獻之漢有岐山銅器章帝章和中出河內悛勔之子非真長也

倅樽副尊也猶之從彝也韓詩外傳晉平公使范昭

觀齊昭願得齊君之倅樽以為壽晏子曰撤去樽孔子曰不出俎豆之間折衝千里智按周禮以倅為副此云倅樽必副尊以盛酒也文王方鼎單鼎作尊彝又曰作從彝何也尊彝宗彝也從去聲即陪鼎之意乃副尊也

壘為大尊獸尊大尊也 凡上尊曰彛中尊曰甬下尊  
曰壺彥遠曰傳曰彛甬壘器也觀上中尊則壘為大尊  
可知其制皆云回後因以名甕而壺亦稱尊壺昆吾圜  
器也古廷設壘泌水戴延西征記太極殿有大銅樽容  
三十斛石虎正會有白龍樽作金龍于東箱樽受龍口  
受五十斛晉元會設白獸樽杜舉遺式也唐回紇傳貞  
觀二十一年陳十部樂設高站置朱提瓶其上潛泉浮  
酒自左門通站注之瓶轉受百斛鐐盎回紇數千人飲

畢尚不能半朱提音殊時諸葛書曰漢嘉金朱提銀唐之曲州今敘州府城西有朱提山唐有鶴尊背上注酒則一足倚宋有百寶酒船大抵唐宋皆倣三代鑄尊壘卮卣之類入博古圖皆三代也白獸樽卽白虎尊唐諱虎作武或作獸

鼎爵卣觶可名舉者杜舉之類也李公麟得古爵于壽陽紫金山腹有二字曰已舉王玠獲古爵于洛下有二字曰丁舉廣川跋周舉鼎曰已爵為舉丁卣為舉此

鼎亦名舉凡可舉以進皆曰舉杜簣謂之杜舉是也新平張氏得癸舉人以為觚乃觥也

繚餽鼎糝鼎也 宋鼎銘曰宋公繚作餽鼎又宋夫人

鼎銘曰宋君夫人之餽飭鼎又有叔繚鼎廣川曰竹書

有宋景公繚而史為頭曼孫炎以繚為頭曼合聲今考

班固漢書猶有兜繚亦著其聲如此古有左鼎陪鼎特

鼎傳曰糝謂之餽又曰筍之為菜餽也則餽鼎糝有菜

之鼎也東觀餘論以師春內有宋公名繚可為此鼎之

證而陸文裕又疑繚女為一字不必矣

觴豆實酒之器 武王于觴豆為銘大戴禮踐阼篇言

受師尚父丹書之戒而銘几席諸類也觴豆之銘曰食  
自杖食自杖戒之憍憍則逃憍居天反注盧氏曰無求  
醉飽自杖而已考工記以瓦為豆醢人四豆為木齊晏  
子言四升為豆以金為之公羊傳田狩一曰乾豆注祭  
器為狀如鐙乾言以撩亮實豆也晏子所言則量器矣  
古器之遺者如祖癸豆姬賓母豆皆銅豆也珉豆實三

而成觥則亦可量也按觴豆固與祭祀之楬豆玉豆有分蓋嘗用以飲食者非但盛乾物也唐六典光祿式言簋簋居前各四登鉶次之各六籩豆為後簋簋大居前籩豆小居後也一升曰爵五升曰散簋實一觥孔穎達曰籩如豆者皆面徑尺柄尺亦依漢制知之其實皆容四升說文觶受四升鄭曰受三升者是孔氏曰觥受五升或七升梓人為飲器勺一升爵一升觥三升爵以獻而酬以觥一獻而三酬則一豆矣食一豆肉飲一豆酒

中人之食也康成曰觚當作觶彥遠引作觥智按古豆與斗通卮觥觶一聲後乃分用

有跗曰鐙無跗曰鉶 鐙都滕切鉶徒徑切其形若杆而中施釭有跗者曰鐙無跗者曰鉶謂下施足也爾雅瓦豆謂之豆注即高鐙也歐陽集古錄林華官行鐙楚辭蘭膏明燭華鐙錯注鐙鉶也徐鉉曰鉶中置燭故謂之鐙今作燈登以肉加又與鬻異說文曰彛禮器也讀若鐙公食大夫禮大飴涪不和實于鐙宰右執鐙左執

蓋記曰夫人薦豆執校執醴授之執鐙康成曰鐙豆下  
跗也授醴之人授夫人以豆則執鐙按鄭非是夫人薦  
豆當錯于筵前執醴則當授尸故豆則執校醴則執鐙  
豈一豆而執校復執鐙乎酌醴用觶鐙或為觶之跗名  
乎蓋登為豆之深者故可以盛渑注膏油其中則可以  
然照加錠者所以插燭也今人又謂傾銀曰錠陸孫收  
入徑韻博古圖有錠銘曰王氏銅虹燭錠字畫與漢五  
鳳鑪相類楚詞之所謂縣火即宋以來之提鐙也王保



定撫言曰胡鉦與裴慶會犯分者擊以鐵躋鐵躋燈臺也韓愈短檠歌則呼燈臺為檠今以置燭為錠燭頭曰燭即管子右手執即尹知章讀即為精謂燼也詩紀注引作彝杜陽雜編以燭為脂炬德山吹滅紙燭乃今紙撚也

爾雅雖以木瓦分豆登然有銅者執校則豆之跗也執鐙則醴解之跗也廣川曰房中之羞主婦右之則有羞豆加豆有鐙有校故醴曰夫人薦豆執校執醴授之

執鐙則執豆之附也此彥遠據康成說也智按校鐙不當重言鐙乃醴醢之承者解見上文矣細推古書鐙鍬皆謂其敦然在下者轉音別字讀鍬為對耳又推脚轉去聲為校則執校即脚也京山引南史王亮傳亮父諱猷晉陵令沈瓚好犯亮諱向亮作無骹尊旁犬為犬旁無骹尊骹即脚也謂猷字尊旁犬也說文彘以別豎鄭吳作豎馬鐙當從豎去聲則以燈別之

楬豆木柄樸豆也又為敬名曰楬藥者表識也 記曰

鞞鼓控褐鄭曰祝敵也控苦工苦江二切褐苦瞎切說  
文曰褐染也引春秋傳褐而書之孫氏其謁切尹子心  
傳注褐著姓名是也明堂位夏褐豆商玉豆周獻豆注  
褐無異物之飾也方氏曰褐豆以木為柄若蜡氏之褐  
而已玉豆于褐之上又飾之以玉獻豆若周官再獻之  
獻是夏豆可謂樸矣唐褚遂良傳言禹雕其俎諫者十  
餘不止何耶魯祀周公用玉豆雕簋注玉豆即殷玉豆  
雕簋將兼用夏制耶韓非子曰禹作祭器墨染其外而

朱畫其內楬豆亦未必無飾也蜡氏置楬注引今時楬  
檠職金楬而璽之鄭司農曰今時之書有所表識謂之  
楬檠孔穎達疏即今之版所謂以木為柄柄即豆之下  
承豆之莖跣也上加漆畫理亦宜之或曰啟即楬楬有  
虎形背如鱗次其畫虎斑與乳篆乎是未可知矣

三尺桑之畢非畢翳之畢也畢以載牲博三寸長八  
寸柄長二尺四寸丹漆兩頭見三禮圖引詩云有捋天  
畢載施之行禮曰畢用桑長三尺刊其柄末畢所以助

主人者月令曰罔羅畢翳注云羅小而柄長謂之畢大東傳云畢所以掩兔象畢宿為之混引非也鹵簿有畢畢

飲盱蓋飲孟也

廣川跋王子吳飲盱云潞國文公所

得銘曰王子吳擇其吉金自作飲盱書家考古無此字而盱見三蒼知為鼎也而又款為享器智按諸書並無盱字金石韻府亦無飲盱盱殆即孟字乎董又云寶和鐘銘與季姜飲孟及石鼓皆以甘為其既有季姜飲孟

則此飲馔即飲盃是一證也篆書各國之書自取茂美如則可從則亦可從刪亦可從刪也

觥與觥同觥即觥也以圓與稜分不必斤斤論大小也彥遠得亶甲城觥以為觥又得李氏觥無壇宇廉隅鄭玄謂梓人之觥字當為觥觥與觥同制禮器制度曰觥大二升觥大三升饋食禮主人洗爵獻長兄弟于阼階上長兄弟洗觥為加爵則觥倍于爵其當二升古人之論盡如此余是以知梓人之書誤也智按韓嬰謂一升

曰爵二升曰觚三升曰觶四升曰散注疏或曰五升曰散亦揣摩分大概耳古者權量三不當今之一彥遠未必即確古器亦時有增減列國自造豈盡準考工如今人造酒器洗器盛器但分大小其細微寧可拘乎今有飛戟出口之瓶亦謂花觚雖非其物乃其遺稱也伯厚曰古卮亦作觥是古卮觥觶皆通而後分之淺者為卮深者為觥耳有稜者曰觚無稜者曰觶觶常有最青綠花紋者不能容今之一升則不能容古之三升明矣觚

本以觚稜名急就奇觚謂其一稜之面可書則以稜辨酒卮何疑

瑚璉一作瑚璉胡輦 論語載夏曰瑚商曰璉而明堂

位言夏后四璉殷六瑚說文瑚璉也里典切箋引漢韓勅修孔廟禮器碑有胡輦器用句按此乃匡簋之類或以木為之因其實故又從玉徐鉉必以璉為俗非也

栝有足曰歲栝有槃曰案 周禮掌次王大旅上帝則

張瓊案

鳥肝切

設皇邸祭祀朝覲會同師田皆設案康成



曰以氍為牀也六書故亦曰榻類此豈牀榻乎在今為  
香案之案以氍飾之古無此則是几耳與純席之類比  
若以几為牀後人自漢晉來俱以所坐之椅為牀如元  
凱連榻江敷移牀何與于几邪案又為盥案之案史游  
槃案并列孟光舉案齊眉正謂盥案周禮玉人案十有  
二寸亦非几席也文選注漢春秋淮陰侯曰漢王賜臣  
玉案之食萬石君對案不食案正與於禁之類相同若  
今臺上作小几數寸者上以承爐盒諸物舉案者如舉

酒卮者并舟而舉也舟今之酒衣杯之盤也朱博不好  
酒色案上三桮升菴直以案為椀恐尚微別曾用椀巖  
椀虞俎也珠盤玉敦敦音對槃類漢禮有瓚盤大五升  
口徑八寸下有槃口徑一尺其遺也鹽鐵文桮畫案方  
言案陳楚宋魏謂之檹杯秦晉曰盃趙魏曰械或曰盃  
大者謂之聞吳越間曰盃齊若平原以東或謂之盃桮  
小桮曰盃音感元美有意駁升菴至曰盃光能石白而  
況案乎則更可笑矣何燕泉曰舉案當讀如盃升菴取

之元美何不並譏燕泉邪

洞案瓊案之遺也 宋祁筆記正仗設洞案于兩螭間  
修注官夾案立蓋通朱漆為案曰洞案唐鄭谷用之當  
音平聲

小甌曰盃即卣也 說文盃于救切或作盃按即博古  
圖之卣卣之中尊也吳慎之作酉古人不知茶甌之稱  
所謂甌小盃盃之類也

匊即窰柴汝官哥定固不若永宣成嘉之盡善也 宋

人言河南土中有羽觴無色澤者舜之陶也此或是秦漢物耳元美云柴窑柴世宗進御未也宋葉寘垣齋筆衡曰秘色窑器世言吳越王錢鏐燒陸龜蒙詩九秋風露越窑開奪得千峰翠色來乃知唐世已有非始于錢鏐宋朝以定州白磁器有芒遂命汝州造青窑器故河北唐鄧耀州悉有之汝窑為魁江南則處州龍泉縣窑質麤厚政和間京師自置官窑中興渡江邵成章提舉襲故京遺製置內窑號邵局澄泥為範為世所珍後別

立新窑大不侔矣餘如烏泥餘杭續窑皆非官窑比陸  
文裕曰哥窑淺白斷文號百圾碎宋時有章生一生二  
兄弟皆處州人主龍泉之琉田窑生二所陶青器純粹  
如美玉為世所貴即官窑之類生一所陶者色淡故名  
哥窑正類董窑其曰均州有五色即汝窑一類也窑變  
則時有之報國寺觀音窑變也今假哥窑碎文不能鐵  
足鐵足則不能聲做定曰象窑有蟹爪紋色白者亦非  
龍泉不能得其淡色淡則無聲格古錄霍器出霍州元

朝刺金匠彭君寶效古定制折腰樣故又曰彭窑高麗  
窑則似龍泉古饒器有樞府字者毛口者低于定大食  
窑則以銅作身用藥燒成五色與拂郎嵌相似今發藍  
或曰佛秣能為之廣語呼林為郎永樂窑質貴厚成化  
窑質貴薄或淡青或燒寶石為綵色宣德有散青者蘇  
勃泥青也嘉靖時有填白壇琰約宣嘉萬回青以重色  
貴古于宋于四羅六羅則景德呼甌碟式也官窑土骨  
坯乾經年重用車碾薄上泐候乾數次出火泐漏者碾

去上泐更燒之故汁水瑩厚如堆脂其紋雞橘質料膩實不易茅蔑也磨弄歲深火色退淨果然妙于前代

鑪鑪見于廣雅其文見于𢇛医 劉原父𢇛仲医銘有

鑪鑪盛旋樵米具𧇲諸字廣雅有鑪鑪劉與歐陽公以𢇛為張字黃長睿曰𢇛音其勿反𧇲與飽同樵音嚼按其勿之音亦不必是黃亦據字書音耳考唐韻入聲無𢇛字巨從工而似𠔁𠔁即匡猶與張近古長亦作亢𠔁或其變體永叔原父似為近之升菴作𢇛中匪吳協三

代鼎器錄則竟作張仲醫董道曰上方張簋獨無旅簋  
大觀元中荆仲馮以其刻藏古器上之其曰鉅仲醫本  
當作医其文亡中作非則医與簋同原父又言鉅仲医  
是医鉅之忍切此又一說也智按刻即冢宋人所改非  
乃亦今刻廣川書跋訛作非耳

銚鑪今之鑪也

鑪

魯戈切

銚

昨禾切

釜也鑪土釜

侯抱切

也

顏師古曰鑒小釜今所謂鍋亦謂之鏃鑪秦名曰𩚑即  
鍋字方言北燕洌水之間謂之𩚑音陳楚之間曰鑄或



曰鑊吳揚之間曰鬲

音歷

漢傳云多齋鋪鍍鋪古釜字此

不音釜正謂銚鑊矮鍋也亦謂之烙鍋烙餅之鍋也類

篇曰鍋鑊器也至今烙餅平鍋呼為鑊

音鑊

有足曰錡無足曰釜鬻今之鼎鍋也

錡亦作敲

魚綺切

釜亦作黼

奉甫切

鑊類也詩維錡及釜毛氏曰有足曰錡

無足曰釜齊四升為豆四豆為區四區為釜釜之實凡

六斗四升按黼本享器加耳與臂為量爾雅甑謂之鬻

才林切

鬻

昌氏切

也烹魚詩注釜屬許氏曰大釜也一曰

鼎大上小下若甑曰鬻古文作鬻按此今南楚黔粵之  
鼎鍋也

敔器侑卮也 文子守弱篇三皇五帝有觀戒之器命

曰侑卮注敔於離切器也荀子宥坐篇孔子觀魯桓公廟

有敔器問守廟者曰此宥坐之器揚子重黎篇或問持

滿曰抗敔注敔器也唐文粹李德裕作敔器賦許敬宗

韋肇亦有賦隋志小說部魯史敔器圖一卷劉徽注器

準圖三卷後魏志信都芳撰安豐王延明所集樂說并

諸器物準圖二十餘事而注之文選注曹大家有敔器  
頌杜預傳周廟敔器至漢東京猶在御坐漢末喪亂不  
存形制遂絕預創意造成武帝嘉歎南齊永明中竟陵  
王子良好古祖沖之造敔器獻之後漢安豐王延明使  
祖暄之作敔器漏刻銘後周文帝大統四年宣光清徽  
殿初成薛澄之頌又造二敔器一為二仙人共持一鉢  
同處一盤一仙人持金瓶傾水灌山而注乎器形似觥  
而方滿則平溢則傾澄各為頌隋藝術傳耿詢有巧思

進敔器煬帝善之曹王皋傳常自創意為敔器以髹木  
上出五觚淳化中學士蘇易簡內直嘗以水試敔器即  
召問之曰此江南徐鉉所作

盃鑊聲轉蓋小鑊也

說文盃

戶戈切

調味器玉篇以盃

為味陸法言以盃為調五味鑊董道曰伯王穀子作寶  
盃據廣韻調五味鑊今以鑊為鑊而以鑊為甕甕為盆  
之大者孫強以盃為大鑊而鑊大鼎也劉臻呂忱以鑊  
為大鐘據少牢饋食禮曰羹定雖人陳鼎五三鼎在羊

鑊之西二鼎在豕鑊之西而禮經改盃為鑊則失其制  
久矣按實鼎曰簠實俎曰載有前體後體體薦體解各  
異盃盃別一鼎盃中肉熟各升于鼎故取于盃以實鼎  
取于鼎以實俎然後以饗食以薦熟禮之成也蓋盃與  
鑊一聲之轉後又有大鑊則盃為小鑊明矣

互峯即亞倉 董彥遠曰田仲方得銅亞鎗識曰互峯  
余知為亞倉漢制東宮給銅龍頭鎗是也智按說文有  
匱古器也而倉為奇字倉南史子良貽何子皙徐景山

酒鎗

銅溫器也

銅

火玄反

鉶即匱黃氏曰銅鉶音遙也說

文銅小盆也博古圖有梁山銅元康元年造鉶有柄可  
以注水廣韻杯匱似稀音移以注水鉶燒器也說文鉶溫  
器也世本曰倕作鉶今世俗之扱灰者亦有火玄之音  
曰杓亦以銅為之其燒器曰鉶者音近弔

鉶鉶即鉶鉶也

鉶

音古

鉶

音莽

溫器也按鉶即鉶字鉶一

作鉶鉶也李時珍曰銅鉶鉶一作鉶鉶即熨斗也升

菴引王莽威斗則絕非熨斗後亦出世變為古物永州有鈇鉚潭以形似之

金鉚香毬也 西京雜記曰長安巧工丁緩作被中香

爐環轉而爐體常平字彙以為金鉚丁緩所作引相如

美人賦金鉚薰香黃伯思跋錢鎮州回文曰寶子不知

何物乃迦葉之香爐也但園若重規其丁緩被中之製

乎緩或訛緩智按干祿書帀正迎俗且無匝字鄭玄注周禮

五就五帀也始自北史繞七匝唐志循牲一匝杜詩馬

頭金匱匝方用之金劉迎詩繡韉金匱匝貂袖紫蒙茸  
故知鉶為後加

華鋐小釵也 王粲七釋云雜華鋐

音拾

之歲鞋孔煒七

引云紫鋐承鬢而聘輝孫恂收入葉韻韻會刪之

以金銀鏤銅鐵曰鍍 張衡賦金鍍

音減

銀鏤謂鐵質金

文飾馬轡也馬融廣成頌金鍍銀鑲今俗以鞍轡什物  
曰鍍銀事件細者曰絲鍍片者曰片鍍鍍一作鉞後漢  
志金鍍方訖升菴以鍍作鍍宋志百官鞍勒金塗銀裝



牡丹枝具雉子白韉陷銀銜鐙所謂陷銀即今之鍍銀也元志作簡銀弱侯作鈿銀

以金銀絲戩器曰商謂鑲嵌也元美曰趙希鵠云夏時器多相嵌訛為商嵌用修以為鑲嵌智謂本商嵌蓋古謂刻為商商金商銀乃古之遺稱也張懷瓘書錄言三代鈿金今之所謂搶金宣盒即唐之戩金也今作去聲曹昭以為刺金兩鈔摘腴曰倅革有鶻箋云鶻金飾貌戩金出此

鉅金曰鎔曰釳 鉅一作鍍詩疏言銷白金以灌沃勒  
環非謂鎔為白金也韻會曰猶今以銀為質金鍍其外  
也以金飾器曰釳音扣蜀有釳刀唐六典有十四種飾金  
法

偏提酌酒注子也 唐元和間改曰偏提今辨古器指  
卣卣之類或有提梁或有單耳者亦稱偏提或云避鄭  
注

三盞酒間也 升菴曰東觀漢記歲首請上雅壽雅酒

間許下切也魏文帝典論荊州牧劉表子弟以酒器名三

爵曰伯雅受七勝中雅受六勝季雅受五勝即升溫革

隱窟雜志宋時閬州有三雅池古有修此池得三銅器

狀如酒杯各有篆文曰伯雅中雅季雅當時雖以名池

而不知為劉表物也廣韻盃雅即注云酒器吳均詩聊傾

三雅卮按爾雅或作爾疋詩作大疋小疋其雅省用牙

牙又作𠂔遂溷為疋邪此凡夫之說智又按說文有疋

字音胥古無家麻韻則雅當為予予近胥邪抑雅省牙

用手而訛疋邪緯略載毛泰買一玉窪八十八萬亦酒  
間也雅之名轉而為窪轉而為間

匹製猶今之沓栝也 古今詩話曰刀約使契丹有詩  
云餞行三匹製匹製以大小甕為之如黃漆此蓋今之  
沓栝俗曰套杯或六或五外大內小

籠絡之器亦曰栝箸不必杯槃也轉為不落 說文箸

箸盧各切也向不知其解智以為即落字猶宋人鉏上之

箸從省文也又按臚栝也則栝落謂籠類也方言栝落

又謂之豆筥孟子栝櫨趙岐曰栝素也智謂如今之蒸籠柳斗之類後世則稱栝託酒託亦稱酒衣或云韓愈用鑿落即本說文此則不必也鑿落言其工巧光文錯落耳清異錄曰白樂天送春詩銀花不落從君勸不落酒器也乃屈卮鑿落之類開運宰相馮家有滑樣水晶不落一隻智按不落反語則當為托

承槃即枰也說文本作槃籀作盤承盤也徐按中山王文木賦製為槃杆古樂苑奉樂一玉枰南史劉穆之

以金枰盛檳榔即盤字也集韻古作槃漢曰承盤今曰托盤宋謂之托子程泰之謂始于崔寧名之曰托因資暇錄也又有鬲塞者乃櫟子環蠟遺制也黃伯思曰北齊畫圖已有之蓋初止謂酒臺盤為托而後緣以為茶盤之名僉載酒令連臺拗倒謂杯置臺中之蒂也陶穀曰劉張有魚英托鏤言以魚鮓為酒臺蓋也

漢時呼扇為攝 禮置翣注以布衣木如攝是漢時之扇以翣思之正掌扇之狀也今閩中有金漆竹掌扇薄

如紙者內外士夫皆得用之鄭玄恐人不識翬體故云  
今以扇為箒箒音亦與翬同人或讀為捷非徐無鬼篇  
叔孫敖甘寢秉羽而郢人投兵秉羽謂扇也其俾倪扇  
擁扇見鹵簿器內

摺扇起于東裔而盛于今日 折扇之妙則此時為盛  
古但有團扇直扇如張敞便面之類耳方面障面竹紙  
薄扇也今世所用摺疊扇亦名聚頭扇子淵曰張東海  
先生以為貢於高麗永樂間始盛行于中國予見南宋

以來詩咏聚扇者多予收得楊妹所寫絹扇面摺痕尚  
存東坡謂高麗白松扇展之廣尺餘合之止兩指許正  
今摺扇蓋自北宋已有之智按遊宦紀聞曰宣和二年  
高麗貢松扇三合摺疊扇二隻倭人亦製為泥金面烏  
竹骨充貢唐韻有撝扇殆亦折扇之萌芽乎

通雅卷三十三



# 欽定四庫全書

子部

通雅卷三十四

詳校官中書臣朱文翰

員外郎臣牛稔文覆勘

總校官降調編修臣倉聖脉

校對官中書臣高中

騰錄監生臣閻學朱

欽定四庫全書

通雅卷三十四

明方以智撰

器用

雜用諸器

簞簞簞皆簞箸也

說文曰簞車簞也一曰簞簞博

雅曰簞簞竹席也又曰車中筵劉氏曰舟中簞曰簞箸

音箸箸箸亦作簞箸智考簞箸小籠也又唐新語曰漁具

總曰簞箸元結傳載自釋語曰能帶簞箸全獨而保生

能學鰲齏保宗而全家則箸與簞箸之音合要論之舟

中蓬筍之席為苓又呼苓筍或作羸筍筍皆其聲相借也漁具簑網亦近蓬筍參差之狀故因而呼之

聚樓猶之卷婁也樓婁借言簑也 莊子死得于豚楮

之上聚樓之中注聚樓筐筥也無鬼篇暖姝濡需卷婁

三者卷樓者舜也羊肉不慕蟻蟻慕羊肉舜有羶行百

姓悅之舊解卷婁拘攣此理解耳仇池筆記以卷婁即

羊亦非蓋盛羊肉之器也合聚樓筐筥之注觀之故知

是曲簑無疑

蘧蔕今蘆席之類也

廣韻曰蘧

彊魚切

蔕

直魚切

蘆蔕也

蘧蔕織竹如席規以為囿以貯穀粟或以取魚擁腫不能俯者似之故因以名其疾晉語曰蘧蔕不可使俯吳隱之以蘧蔕為屏風可知竹簟薄曲之類概可通呼耳周勃傳注韋薄為曲月令曰具曲植與竹箴有分然北方水淀亦有織楷葦成簾以取魚者裴潛妻子織藜苳孫惲藜苳荆藩也籥音篋徒本切則竹簟專為粟用者說文曰以判竹園以盛穀淮南曰守其籥篋本作園俗至今

呼之

簣即算器也

史記鄭當時傳餽遺人不過算器食徐

廣曰算竹器漢書作具器食算从竹从具又作算竿

貫

切

史記曰竿軍食永嘉引說文蜀本𦵏𦵏竝古文律

厯志引書曰先其算命二百七十枚成六觚為一握升

菴引作𦵏又引垂簾下為𦵏子才曰古文固象縱橫之

形也算加匡為匱儀禮士冠禮云各一匱

素管切

注古文

為簣記曰食粥于盛不盥食于簣者盥康成曰竹筥也

雕簣注籩屬或作箕陸氏本義作匱

息緩切

說文簣竹器

也讀若纂孟堅借用論纂古之撰纂音亦通用小顏注  
急就曰簣盛七箸之籠也

斗回取水之筌也冥筌筍也

見文選吳都賦注莊子

作筌一曰積柴取魚則罾也一曰魚筍斗回蓋唐人之

方言今則謂之兜籃或曰花籃程大昌言有倒鬚謂之

筍即筌也因有倒鬚故謂之回一曰冥筌李善引筍橫

溪為梁開缺而設筍

筌蹄謂魚筍與兔蹄也後人合稱之遂以名筌得兔者忘蹄得魚者忘筌筌筍也有逆鬚蹄係蹄也戰國策魏魀謂建信君曰人有置係蹄者而得虎虎沒環寸之蹄而走兔蹄亦以機繩縻兔者也段公路北戶錄曰新州作五色藤筌臺梁劉孝儀謝太子五色藤筌蹄一枚按此乃借筌蹄之稱其實則織藤為籃也筌臺又筌蹄之訛也廣人呼蹄為臺

庖業緯蕭也障魚曰槎頭障蟹曰蟹斲莊子有緯蕭

者取魚也吳都記曰江濱竹繩編之以取魚謂之扈業  
陸龜蒙蟹志曰漁者緯蕭承其流而障之名曰蟹斷劉  
宋張敬兒奉槎頭鱖與齊高帝杜詩漫寄槎頭縮項鱖  
孫炎以養魚樛為槎頭樛謂之涿亦作罾非槎義也高  
似孫引襄陽耆舊傳常禁人捕以槎斷水謂之槎頭鱖  
智按斷水是也為禁人而斷水之槎則支

牆居薰籠也

即篝也篝一名答答音落楚辭秦篝齊

縷鄭綿絡注篝落也又籠也可薰衣方言陳楚宋衛謂



之牆居注今薰籠栝落又曰豆宮蓋又為盛栝器籠說  
文篝答也可薰衣史記篝火注以籠覆火也

合香曰調香曰襍馥曰練香 內則衿纓容臭正合諸  
香也通典有襍馥合香也李賀詩練香薰宋鵲陶九成  
以為合香此乃今之甜香香餅之類非容臭佩之者也  
華嚴經曰粥香長者善調香

鏡篋鏡匣也 篋即奩也後漢明帝視太后鏡奩中物

和凝托名韓偓香奩體當从篋力鹽切唐韻作匳注俗作

簠韻會或作𦵏幣南史江夏王鋒傳大發桓溫女冢得金巾箱織金縠為嚴器即簠器也

屈竹為器呼曰箸箸考老加竹或作桮桮言其屈也

即古之簠

洛早切

受盛器也周官牛人共牛牲之互與其

盆簠盆受血簠受肉蓋即筭筭之形如無柄之簠籬耳

俗作簠籬明皇為祿山作銀簠籬說文解籬為飯筭受

五升秦謂筭曰籬即斗筭之筭

孫氏音山 樞所交二切

一曰簠筭

今俗呼甌筭為簠筭簠籬即古之所謂筭於六切筭炊之

漉米箕也或謂之縮或謂之箕

音

或謂之匡

音

江東呼

浙籤漢書音義烽如覆米箕字林云漉米籤纂要曰浙箕也古杜康作箕帚大率筥圓而筐方筴長筥也箕者疏目之籠其孔樓樓然方言之籩則非盡指籩筥也如筥籤纂皆謂其形似常借呼耳鄭注笄曰如今之筥簋即籩字廣雅曰曄映籩也即筥唐孟榮本事詩載中宗時回波詞曰回波爾時栲栳元志玉輅用栲栳輪蓋五臺山大尖是北臺栲栳山言形曲也

極卽笈 說文極驢上負也凡夫言懷素改作笈智按

李固負笈從師何至唐始有笈乎廣韻因此訓笈為書

箱

滿爰竹器言滿而易援也撲滿土器言滿然後撲也

說文曰節滿爰也博雅曰滿爰節也徐鍇曰滿爰簡牘也或非之蓋今虎林呼竹莊之類可以盛簡牘是細篋箱簾也猶之撲滿為受錢之器亦曰銘其名不可解耳撲滿鄒長倩遺公孫弘者欲其聚而散也

杼井鞮今之水甕也 說文鞮量物之器一曰杼井鞮

烏袁切 箋曰方言籃曰鞮武林謂之水甕

澡槃浴盆也浴盆最古見于王會 王會篇堂後赤轡

浴盤在其中注禮曰杆謂玉藻之出杆也荀子曰杆圓

則水圓魏武上襍物疏有容五石銅澡盤述征記逍遙

宮澡盤面徑丈二異苑言銅澡盤鳴傳玄有澡盤銘南

史劉峻奉齊武帝澡鑪又造金浴盆即盆字劉虬家藏

龜茲國澡灌一口

剔齒纖刺齒也 蔡澤云刺齒肥緯略引陸雲與兄機書有剔齒纖一枝以寄兄西陽禰俎曰仙人鄭思遠騎彪故人許隱齒痛鄭拔彪鬚與之挿齒即愈今人曰剔牙杖極重象尾能去火京師鬻柳杖

隱背曰養和 程大昌載李泌采異木蟠枝以隱背號曰養和按松陵集皮日休以五物送魏不琢一曰烏龍養和且曰有桐廬養和皮陸皆有詩蓋今之靠背也宋志輦中有靠背椅紹興作大安輦雕香龍椅靠背上飾

水晶珠此云烏龍狀其蟠屈今亦有木根坐榻之類

條脫或作跳脫條達 吳曾曰唐盧氏雜說文宗問宰

臣條達是何物宰臣未對上曰真誥言安妃有金條脫

為臂飾即今釧也真誥萼綠華贈羊權金玉條脫各一

枚余按周處風土記曰仲夏造百索繫臂又有條達等

織組雜物以相贈遺唐徐堅撰初學記引古詩繞腕雙

條達智按後漢繁欽定情篇云何以致契闊繞腕雙跳

脫南部新書載溫岐卿言跳脫出南華真經令狐綯怒

之詩話總龜曰南華無此事宋人誤記也胡元瑞言岐卿即飛卿北夢瑣言跳作條非智曰此類之名皆以聲呼何拘之有元美誤作跳盪蓋在今日改其字則不可服席即服匿 漢書於靬王賜蘇武服匿穹廬晉灼曰東方界人呼小石甕曰服匿南史竟陵王子良得古器小口方腹而底平以示陸澄澄曰此名服匿單于以賜蘇武子良視其款識良然程泰之言南唐張僚使高麗曰麗多銅器如斯羅刀斗又有溫器名服席如鐺而底



方高麗所謂服席即北方所謂服匿也阮霧靈言匾瓶可縣身王元美服匿音避匿智謂許慎引易服牛作犇牛人讀為犇而以避音服耳

如意因於爪杖而談者以代麈尾齊高祖賜隱士明僧紹竹根如意梁武帝賜昭明太子木犀如意石季倫王敦皆執鐵如意音義指歸云如意者古之爪杖也或骨角竹木作人手指柄三尺許脊癢可搔如人之意清談者執之鐵者兼藏禦侮

屈戌即屈膝或作鉤鉞 李長吉宮娃歌屈膝金鋪鎖

阿甄陸友仁曰金鋪為門飾屈膝蓋鉸鍊上二乘者為  
鉤下三衡為鉞李商隱詩銷香金屈戌張伯雨有一器  
是香爐蓋有鎖者屈戌乃受鎖之搭連卷口也金鋪是  
門環鋪首今人定以屈膝作帳鉤非也凡鉤上之絡索  
可名屈戌

瓶謂之螢備火長頸瓶也 韻會螢即罌集韻又作罌

螢備火之名亦見於隋唐蓋兵五十人有火一火有長

故稱火伴謂備一火伴之用也

甌缶小口罌也

甌篆作缶

池偽切

缶盆盎一類耳缶即

盎也大腹而斂口盆則斂底而寬上缶字或作甌

剖哀二音

甌甌

洛口切

小罌也說文甌也淮南子曰抱甌而汲列子

云狀若甌甌戰國策醯壺醬甌

音碰

廣韻缶瓦器鉢也方

言關西河汾大者謂之甌中者謂甌甌關東趙魏之郊

曰甌或曰罌齊海岱謂之甌周洛韓鄭謂甌或謂罌缶

謂之甌甌小曰甌罌甌謂之盎關西或曰盆曰盎小者

曰升甌爾雅缶注甌甌謂之甌甌一作甌

抽知切

蓋瑩長

頸甌也瑩亦曰甌總之在今俗為盆鉢甌甌缸缸一作  
瓊貨殖傳醢醬千瓊賞大甌今俗曰礪曰埤獨甌之稱  
異于古今謂茶鍾曰甌古則曰甌甌瓦杆大口而庫淮  
南曰狗彘不擇甌甌此確指小甌盆非今之茶鍾也方  
言亦作甌子盧小甌說文曰匚盧飯器小顏曰賣酒之  
區曰盧即相如傳注累土為盧也張子賢言東坡在儋  
求一具理酒亦甌也

甌盆之臙今之甌箎也 韓詩外傳舜甌盆無臙古史

考黃帝始作甌甌又呼為鈔

音修

白虎通曰王者德至山

陵丹甌見陶人為甌實一甬厚半寸脣寸盆甌實二甬

鬲實五穀注甌無底甌左傳齊賂晉以紀甌釋文玉甌

也宋太宗時長安民得甌其狀下為鼎三足上為方甌

中設銅箎可以開闔有鈎在其側勾中正識其文曰甌

也遂藏秘閣甌盆無臙正無底甌也今人曰甌杼或曰

飯杼箎臙猶身之臙中也淮南子弊箎甌甌

音甌

甌帶也

朱子以簞為甑帶按帶在外而甑孔在底臚乃安于窒者合溪以窒通宗王敬則以刀環塞窒音圭孔甑空也三省曰門旁有孔三角以窺外人智按圭竇窒孔言小也不必三孔泥圭

盞盂鉢也 方朔傳注孟者今所謂盞音盞盂也即今之鉢盂也唐人以鉢為盞

罍孟聖周也 庖言曰舜作瓦棺土聖見古史史系天監五年丹陽山南得瓦物高五尺圍四尺上銳下平如

盒沈約云此罍孟也死則坐葬之檀弓夏后氏聖周是也

屏風有疊扇可開闔曰連屏 賈公彥云屏風之名出于漢世春秋後語云孟嘗君屏風後嘗有侍史記客語則前已有屏風掌次設皇邸注邸後版也疏後版者為大方版於坐後為斧文言屏風者據漢法況之曲禮當依而立疏依狀如屏風觀禮鄭注云依如今緋素屏風也東方朔淮南王有屏風賦鄭弘傳置雲母屏風升菴

引此作雲岳屏風注即雲氣山岳也今無此說不知何  
見古今注孫亮作琉璃屏風魏志太祖平柳城以素屏  
風素馮几賜毛玠魏徵傳帝以所上疏列為屏障唐刺  
史姓名錄于屏風太宗命寫列女傳于屏風世南暗疏  
之李絳傳元和二年為學士憲宗命絳與崔羣錢徽韋  
弘景白居易等搜次君臣成敗五十種為連屏張便坐  
舊紀元和四年御製君臣事迹十四篇書于六扇屏風  
是月出書屏以示宰臣李藩等表謝之紹興中作君臣



事迹屏高宗命鄭謐書盤庚無逸詩之車攻篇孝經孝治章列于左右嘗以諭輔臣乾道元年晚御選德殿御座後有金漆大屏分畫諸道以黃簽標識職位姓名上指示洪适等曰朕新作此屏其背是華戎圖三年鄭聞奏司馬光進五規簡當明白乞命翰墨之臣書為連屏上從之智按連屏雖見於唐然南史王遠如屏風屈曲從俗梁蕭子雲上飛白書屏風十二牒牒與疊同則已非獨扇直體屏風矣七修類稿言古有硬屏無軟屏軟

者圍屏也圍屏與洒金綵漆皆出于日本此仁竈未考  
古連屏屈曲之義肆說也

屏亦有呼削哺者後漢方術楊由傳風吹削哺注曰  
削哺屏障名顏氏家訓曰風吹削哺為削札牘之哺是  
也然章懷太子集諸儒注後漢書亦必有依據當時之  
諺應有以屏障呼削哺者黎美周曰哺與鋪通漢謠曰  
城上烏尾畢逋唐人多用平鋪字畢逋平鋪之轉也唐  
詩舞閣金鋪謂防風屏障也王志遠立亭偶筆曰清防

屏風名見顏延年詩

輓車送亡者之紙簍也 酉陽雜俎送亡者以黃卷蠟

錢免毫弩機紙疏掛樹之屬又作輓車古簍也簍似屏

今京師有古簍方尺許厚二三寸似小屏簾楮為之粘

飾以銀箔送亡之資即此物歟按簍當似箱古人謂箱

為屏擋故亦以屏呼之法苑珠林云紙錢始于殷長史

唐王璵用之祠祭愛日齋叢抄引洪慶喜杜詩辨誣云

齊廢帝東昏好鬼神翦紙為錢朱文公謂與紙衣冠何

別則冥襴亦芻靈也柯古又曰魂衣曰上天衣縗鬼衣也桐人起虞卿明衣起左伯桃挽歌起紼謳

倚卓之名見于唐宋余記唐末小說有倚桌字宋黃朝英言椅木名棹與櫂通但當用倚卓楊億談苑云咸平景德中主家造檀香倚卓俗以為椅子卓子宋鹵簿有金倚張九成見宗杲推倒卓子元史大定七年肆赦儀設鷄盤置金雞銜赦書于應天門外設卓子閣門官取赦書于卓子讀同話錄曰交椅謂之繩牀敵制也歐

公不御

敔案斜搯之具也

陸雲言曹公物有敔案隋煬帝嚙

戒師有白檀搯頤一枚山谷跋閭君校書圖有云搯頤一酒榼果櫺十五一人右手執卷左手據搯頤是其類也

榆櫺以榆木為經函也

水經注穀水逕白馬寺東明

帝發使天竺寫致經像始以榆櫺盛經朱謀瑋曰吳越春秋嘗有甘蜜九櫺文筭七枚之文櫺與竇通智按直

翁引為九欖以證越椒誤矣欖乃桶之轉聲齊民要術云榆十五年後中為車轂及蒲萄甃知以榆木為甃遠致蒲萄也甃甃欖三字互通則榆欖乃以榆木為經函耳

鹿盧兜鈴也 喪大記注以紼繞碑間之鹿盧今作輓輓井上汲水名之一作輓輓一作橈輓子雲賦輓輓不絕音雷盧即謂輓輓環轉也唐人以聯句為輓輓體亦謂其轉也光武紀注烽燧有兜零今所謂零當輓輓也

桔槔用輓轆船上桅檣之兜零謂之五兩有此則挂帆輕捷古玉圖攷有鹿盧云佩環也古衣服令曰鹿盧玉具釵今見其物蓋方環上有輓轆銅轉紐耳

廁踰穢器也 廁徒侯與俱二切說文曰築牆短版也

賈逵解周官械虎子也智以械與穢通甯行清受糞函或作脩與踰通史記石建取親中裙廁踰身自浣洒蘇林曰行清也孟康曰行園中受糞者東南人謂鑿木空中如槽者為踰晉灼曰世謂反門小袖衫為侯踰乃別

是一名侯鯖錄言李廣射虎斲頭為枕鑄銅象之為洩器曰虎子亦曰虎枕智以此為流傳之說然洩器為虎子固方言也晉諺曰仕進不止執虎子謂為侍中親近褻器也莊子漆智伯之頭為飲器或以為褻器刺客傳飲器為虎子呂覽作洩杯嘗攷漢書傳有言以老上所破月氏王頭為飲器者共飲血盟則飲器與虎子自二物矣陳水南曰獸子者褻器也或以銅為馬形便於騎以洩也俗曰馬子蓋沿于此然則古之受大小洩者或



俱以虎子呼之

踏犁人耕也 淳化五年武允成獻踏犁一具不用牛  
以人力運此亦趙過教以庸輓犁之遺也陳堯叟齋踏  
犁往宋州景德二年內出式凡四五人力可比牛自尚  
方造樣唐王方翼傳為耦耕法張機鍵力省而見功多  
今立扈徐公以西法編為農書有機轉耒省力代牛詳  
矣東坡志林曰湖北農夫用秧馬行泥中極便唐書回  
鶻部族黠戛斯傳云其人以竹馬行水上以版薦之以

曲木支腋下一蹴輒百餘步意殆與秧馬同類雲南志

夷疇三人使二牛以一日為雙以二乏為已二已為角

四角為雙說文犂

非尾切

兩壁耕也智謂當音排

鈐鑢鉤銓犂與鎌也

鈐

巨廉切鑢

時安切

大犂也廣韻鈐

作鈐說文亦曰鈐鑢大犂玉篇作鑢鉤即鎌形如鉤亦

曰鍬

苦節切

說文鍬鎌也龔遂傳注鉤鎌也方言刈鉤江

淮陳楚謂鋤鋤閬西曰鉤鎌鍬今天下皆呼鉤鎌刈禾

短鎌曰銍

知栗切

詩奄觀銍艾注銍獲也管子曰一農之

事必有一銓一耨一鉞小爾雅截穎謂之耨則今沅靖  
苗中之法也用勒鐵一片刈穗成束而倉之

櫟杷平田疏田器也

無齒為櫟

博拔切

有齒為杷

蒲巴切

廣韻杷無齒杷也又作櫟方言杷宋魏謂之渠挈或謂

渠疏渠廣韻作潒貢禹傳捫草杷土釋名曰齊魯四齒

杷為櫟

音劬

大玄進以櫟疏唐諺曰櫟椎侍御史盪脫校

書郎言其易也說文櫟

戶昆切

六义犁也拂

數勿切

連枷也

櫟

與辟切

種樓也一曰燒麥杔櫟也

與職切

田器也箋引

匱其田曜換易字不必

茲其鉏也 周禮籒氏春始生而萌之注萌之者以茲其疏曰漢時茲其即今之鋤也國語曰耨茲其也孟子作鉏基陰幼達作鉏鉏釋名曰鉏助也即鋤謂鉏通作苗非也考工察其苗注鄭司農云苗讀如雜廁之廁泰山平原所樹立物為苗傳立裊基以為苗瓠子歌捷石苗謂甬石填土也莊子身如短苗一作櫛木立死也苗從草從田卅音災川壅也爾雅田一歲曰苗始反艸也

水排炊火之車也排一作橐鞴鞴杜詩傳詩守南陽  
造作水排鑄農器力少功多百姓便之注冶者為排以  
炊炭今激水鼓之當作橐大和二年內出水車樣令京  
兆造給此即水翻車也今西法水車尤巧魏志韓暨為  
監冶謁者舊時冶作馬排每一就石用馬百疋更人排  
又費功力暨乃因長流為水排利益三倍想即水碓水  
碓之制杜預作人排南史韋孝寬以皮排吹之裨蒼韻  
會作鞴吹火韋囊也或作鞴蜀鹽井用筒井法甚巧

碓磑舂礮也扇墮風箱車也

碓音對以舂礮五對切以礮

亦謂之礮千對切

見方言古者雖父作礮魯班作礮廣雅

礮礮也通俗文曰輻車杜預有連機礮孔融論水礮

之巧王戎有水礮李元紘傳權家傍渠立礮是也後魏

書曰崔亮在雍州讀杜預傳見其為八磨遂教民為礮

扇扇車也墮扇車之道也墮音類或作墮墮之言墜也俗

號風車或曰扇箱

舩舫淺船也舩舫大舩也唐劉崇龜傳乘舩舫亡去

此即今之淺船也形扁故呼為扁子其在灘河中則曰

扁灘

上聲

北堂書鈔云豫章城西有舳舻州去度支前二

里是呂蒙作舳舻大舫

即區

處水經注作谷鹿州箋云是

句轆廣雅舳舻

音鈎鹿

船也

最小曰艫小而深者曰艪小而長者曰須慮長

艫

楚結

切

杜詩最能行貧窮取給行艫子通鑑隋時善安遣刺

客乘魚艫殺黃州總管周法明方言南楚呼艫

音邛

或作

舳禮韻之舳即艫也今皖之太湖呼小而深者曰艫

訛為舸舨越絕書越人呼船為須慮長即舸舨也

倪謂之統一曰五兩 劉平水曰船上候風羽楚謂之

五兩淮南子云倪之見風王維詩惡說南風五兩輕候  
風者一曰相竿危言古今注曰夏禹作伺鳳相竿也鳳  
誤合二字

牽謂之百丈亦謂之筴 增韻曰挽舟索一名百丈本

作拏長箋作緯今俗呼去聲按國策纏牽長則已讀去  
聲矣南史朱超石傳沿河南牽百丈有漂度北岸者演



繁露曰白樂天入峽詩葍蒻竹篾窓窓即百丈也

腰舟即中流之一壺也 鵲冠子中流失船一壺千金

壺與瓠同莊子瓠樽司馬彪曰樽若今所謂腰舟也前人方言有腰舟之語

艚即艚也大舫也外裝蒙者曰艚短深曰舫長曰舫舫  
哨船曰金翅歌舫本之餘皇因作舫皇言大也 大

船曰舫

託各反

見隋紀夏侯明徹殺蘭鼓持勃首降囚安

都等置所坐舫下即舫也孫愐曰兩槽大船也所用舫

鴉鵂鴉船長兒侯景召石頭津主張賓使引淮中舩舩

及海舩

舩音又舩音蒲故切

方言船短而深謂之舩舩

尺庸切

即蒙

舩也樊毅謂袁憲曰京口采石各須銳兵并出金翅二

百船名也是哨船類劉晏為歇舩此本吳之餘皇又作

餘舩或作舩舩取寬容平榻正舩屬王濬造連舩四出

門馳馬即舩類也博雅舩

音墨

舩也隋志有龍州舩舩梁

睿請伐陳文帝詔曰若命水龍終當相屈水龍謂戰艦

也楊圭永安造五牙之類

獨鹿小罟也

樂苑有獨鹿篇獨鹿獨鹿水深泥濁荀

卿成相雜辭曰獨鹿棄之江注為網名王元美曰獨鹿  
罟鹿也蓋是罟麗字罟當从艸土之左得聲訛為主字  
若罟則音卦罟音獨張位問奇集朱光家指南皆作麗  
罟音六獨則其誤更過于元美十倍矣

撿罟謂之櫟 毛傳汕汕注櫟也箋曰櫟今之撿罟殆  
獨鹿之類

覆車翻車網也

罟為覆車今擲倒技戲中有手足躍

轉成輪者名曰翻車網至今稱之

窶簍竹器也

李石言窶簍引王叡云東方朔以為寄

生賣餅人結茅為經以戴頭上狀如環楊惲傳鼠不容  
穴銜窶簍東方朔注亦云戴于頭者廣韻窶簍四足几  
蓋宮簾套簍之類或有足或方或員皆是也所謂不容  
穴者言銜竹器則不能入宮簾之類不論大小只狀其  
瑯當樓櫺耳寄生附木而枝葉扶疎窶簍口大而下小  
今以賣餅經言之亦指其瑯當樓櫺耳今語摟搜亦云

羅娑亦云樓羅窰窰正取樓搜之音

髹漆謂之西皮 因話錄曰馬韉自黑而丹自丹而黃

五色相疊曰西皮以髹倣為之智按宋漆有犀毗即史

師比借稱其雜采也雲南棋碁香盤皆五色相疊是其

類矣陶九成曰胎骨曰捲素膠和嵌縫曰梢當去聲然後

加三灰日久糙漆停久磨之始用黑光其漆加雞子青

日晒試緊慢多入觸藥乃成黑光既乾乃揩石磨出漆

類揩石所謂雞肝石也鰻水煎桐油入丹粉無名異也

格古要論曰元西塘楊匯有張成楊茂剔紅即雕漆也  
次曰堆紅又元嘉興彭君實能作刺金漆器宋內府有  
細螺即螺鈿也游宦紀聞言宣和六年李資德富轍上  
螺鈿硯匣皮曰休詩襄陽作髹器中有庫露真升菴曰  
今呼書格曰庫露格即方言之鹿酪今謂鹿角顏注趙  
后傳殿上髹休澆二音漆今關東器再著漆謂之梢漆梢即  
髹聲之轉關西云黑髹盤朱髹盤叅从木下象形作漆  
非永樂果園廠製最精大約剔紅填漆戣金倭漆螺鈿

宋多金銀為素近以錫木為胎舊稱蔣製倭漆與清鑄倭銅正統楊埧描漆隆慶方信川螺蚶黃平沙剔紅雲南作者刀不藏鋒稜未磨也近徽吳漆絹胎鹿角灰磨者螺鈿用金銀粒者皆佳

煨蠡一作煨蠡謂瓢蠡簞蓋之類 子雲長楊賦燒煨

蠡張晏曰乾酪母也此是臆說別無出處智按說文蠡瓢也方言蠡或謂之瓢周禮瓢齋集韻一作盃盃煨人甯儀禮有高甯謂幕甯也董道叔繇甯銘有甯彝尊甯

說者謂以木橫貫鼎而舉之謂竈此解亦拙矣今作爇  
蓋炊器臚盤或紐蓋可舉者類韻略有筠簣舂帶也車  
拘簣謂之簣皆因竈生義從冥者省耳呂向曰各部聚  
落燒之使盡此為得解何定以為酪母乎

直植木曰櫨橫架曰桁立曰櫪橫曰程度謂之架閣平

架謂之禁

古樂府東門行曰還視桁

音杭又去

上無縣衣

爾雅在牆曰樨竿謂之櫨則亦桁之類凡直植曰櫨橫  
架曰桁曲禮樨櫨之架明是今之衣架也在牆者置之



壁間或壁間縣一桁皆是也方言別作椀以為榻前几  
非矣古架謂之閣度間也今人曰閣版或作鹿角架釘  
在壁上架小者謂之禁架士昏禮注度輒有禁因而承  
尊者亦有架記曰大夫士櫨去聲禁鄭曰制如今大木舉  
上有四周無足又曰如今方案櫨長局足高三寸此與  
余所解椀案略同但局足耳康成以櫨為無足者非矣  
厚盤之類也又曰橫者曰棎植者曰櫪弱侯曰牀前橫  
木曰棎音汀牀前几亦曰棎岳珂棎史取此晉朱雀桁乃

航莊子桁楊乃夾脛刑具也皆借用

今之立饋古之閣也 補筆談曰大夫七十而有閣天

子之閣左達五右達五閣者版格以皮膳羞者正是今  
之立饋今吳人謂立饋為厨者原起于此以其貯食物  
也故謂之厨俗作櫥立饋亦作立櫃閣格一聲相轉

筵筭或作挺專九姑課折艸卜也 楚辭曰索瓊茅以

筵筭 音廷 朱子曰筵小折竹也舊註楚人結草折竹以

卜曰筭說文筭筵也維絲筭也筭車即紡車筵小管也

詳見柅簞下莊子舉筵與楹一作筵智謂其舉小與大

耳東方朔曰以筵撞鐘言其小耳急就有搏榼枹槌搏

一作枹

音造

小卮說文作𣪠其形團搏與筭通竹木異耳

其實筭團竹器也或曰并舉而言筵為直竹莖筭為團

竹格也六書故音筭為徒官切正與此合以竹片圍而

編成或以筭或以圈皆是也枹圓扁榼漢書美酒一枹

榼槃也後漢書方術傳序有逢占枹專須臾之術逢占

逢人所問而占之也注曰枹專即筵筭枹八股竹輟耕

錄言九姑玄女課折草一把以三除之不及者為卦論  
其豎橫有太陽老君太吳洪石等九號楚辭注曰瓊茅  
靈艸也楚人結草折竹以卜其此類乎說文專六寸薄  
也箋云不可解智按後漢書單用挺專方言博局亦曰  
𣦵專箒以𣦵加寸竹蓋編竹為之

櫛杷屎一物也 說文曰杷實如黎屎箕杷也櫛絡絲  
跌鄭夾漈曰屎箕杷也陸氏曰讀若昵一曰杷止車木  
易繫于金杷者以金為之草地為固孟子止或尼之其

通義也絡絲跌因以為名温州至今云絡柅也列子墨

屎亦見方言屎即屎之省文耳墨音眉因其轉滑寓多

詐義小補引作墨屎誤矣柅柅實一字絲之筵即篋

王縛

切柄合溪何疑焉說文收絲者也方言曰篋棖也亦作

篋又作𦉰𦉰篋今江南收絲似小攬車中有柄聽絲旋

其外而中軸自轉總曰絡子

凡梩而附于木曰柅

柅

甫無切又去聲

闌足也傳曰梩音邊柅

跌附二音所以籍幹者梩卑眠切杜預曰棺中苓牀也考工

弓人曰於挺臂中有柎焉故剝鄭曰側也又曰為弓方其峻而高其柎又曰下柎之弓末應將興為柎而發必動于綱鄭曰弓柎卑弮應弦則柎動少儀穎削授柎亦謂木片也士冠禮曰素積白屨以魁柎之柎方于切魁蜃蛤灰柎注也以木片附塗之令白也漢靈時師宜官善楷甚矜其能每書輒削而焚其柎梁鵠乃益為版而飲之候其醉而竊其柎此木梯也鎡錠之柎則跌也梯篆作𣎵芳吠切削木札也說文陳楚謂牘為杙

黏斗古之貯黏麴器也 趙希鵠言有古銅小提卣有

提梁索股有益盛乃古之黏斗也黏謂糊也俗作黏硯

北雜志宋學士王寓謝賜筆札記云有琴光螺甸匣貯  
黏麴塗金方奩古文用蠟炙緘啓謂之蠟斗御覽載東  
宮舊事曰漆貂炙大函一具

鑿鑿眼鏡也 洞天清錄載鑿鑿老人不辨細書以此

掩目則明此出元人小說作鑿鑿出西域誤作鑿耳方

與勝略滿刺加國出鑿鑿今西洋有千里鏡磨玻璃為

之以長筒窺之可見數十里又製小者于扇角近視者  
可使之遠

卜筮當為卜教或作盂琰 演繁露言盂琰用兩蚌殼  
或以竹根又山襍纂曰殢神擲校是也各書無琰字荆  
楚歲時記曰秋社擬教于神石林燕語高辛廟有竹柘  
筮以一俯一仰為聖筮說文筮竹索也大昌作琰

細要今則子也 王符潛夫論有細腰青藤路史曰社  
形如今銀則子俗所云錠樣也故文曰古者棺不用丁



漢時呼為小腰即今天平法馬也衣箱合處曰衽棺與蓋合處亦曰衽先鑿木衽然後束之

唐以平脫帖白名器 唐鑑玄宗辛卯為祿山治第曰彼眼大有帖白檀牀二銀平脫屏風酉陽雜俎又載金平脫犀頭匙箸金銀平脫隔銀鈍盤平脫著足疊子銀平脫破觚銀平脫食臺盤貴妃賜金脫裝具玉合按古以平而凹起為脫如土室為甌脫如甌之脫也高宗時櫪椎盪脫之語謂如盪所脫之易也今以木為凹印以

飴餅印之謂之脫言易成而滑脫也故手釧曰跳脫言滑也此曰平脫有專言鑲托者非蓋自是前人語帖白謂緣飾帖邊之類

拔髮謂之鉤後作鑷 南齊書廢帝言太翁高祖曰為

人作曾祖而拔白髮乎即擲鏡鑷按說文鉤涉葉切鉤也

玉篇鉤女輒切拔髮也凡夫曰兼鉤江北曰折鑷

枕杌者枕几也 方言曰俎几也西南蜀漢之郊曰杌

郭璞音賜智按後漢書鍾離意傳言藥菰嘗無被枕杌

食糟糠自此賜餐及皁袍俎几蓋陳食隋槃有足者如  
盤案之案非憑玉几之几又況今日之香几書几乎杜  
集韻亦作棧因古徙作延也

界尺曰隔筆簡 研北雜志曰宋太祖以柏為界尺曰  
隔筆簡王寓謝賜筆札記有象尺殷芸小說庾后以牙  
尺打帝頭可知古人衡方者為界尺取其填壓也

飯糝挾提謂匙箸也 儀禮有司徹注挑謂之執二匕  
如飯糝又曰今人或謂箸為挾提

黃屑細香也。舂案龕案也。搔勞篋籬也。顧遜園考金

陵諸志載陳後主施瓦官智者禪師有闕寶樓舂案一  
面小羊髻麈尾一柄又宣口勅不許讓口又送扶月供  
沈后致書送扶月供薰陸沉檀各十斤黃屑一斗隋煬  
帝觀戒師銅搔勞一口白檀支頤一枚南樞夾膝桃一  
枚梯心筆格一枚鍤石莊梯心經格一具智按闕即嵌  
舂即龕髻即髻六朝之末隨意創字也扶月猶言依月  
今云逐月送供是也黃屑香之細者開元十道志驪州

貢黃屑𦵏者釋家言𦵏施也

音視

搔勞篳籬之聲也方言

曰縮曰篳皆搔之轉也松陵集陸魯望以竹夾膝贈皮  
篳美即急就所謂家也伏几也桃與挑同南樞即闌斑  
枏櫨子木也柿心猶棗心也唐人曾用之朱子跋蔡藻  
筆試所製棗心樣山谷言即奇棗心散卓其檀心筆謂  
瘦而白色也古柿即柿柿與棗聲相轉羊柿一名梗棗  
可證六典三式局棗心為地則是棗木之心

重鞞即重茵古作因

東觀漢記蔡遵有病詔賜重茵

韓詩外傳子夏謂公孫曄曰東至阿遭齊君重鞞而坐  
吾君單鞞而坐我從十三行之後掄其鞞考吳敬甫魏  
子才皆作因字象形後加草革尉佗象牀錦茵霍禹加  
綉茵憑

菟白席地隔之類也 劉宋起居注元嘉中為御史中丞  
奏風聞廣州刺史韋朗于州部作菟白席三百二十領請  
以事追陳喬生曰即菑船地隔也茅菟染紅故曰菟白姚  
以式從濠鏡得之一名嘉文席即拾遺記之渠席也又言

崑崙有葭紅色可編為席今是染色織作細方勝兩末有  
橛星或垂綏以防蟲蟻東宮舊事太子有獨坐龍鬚席崔  
豹謂之虎頭席即今肇慶金渡之細席也葭席則桃枝竹  
席古人通稱席以藉以障則葦席也後世筵席本此

昔席細席皆謂平日之講席也 尸子引子夏曰侈于

五兵而辭不懾臨大事不忘昔席之言荀子曰臨患難  
不忘細席之言注細席講論之席王吉所云廣厦細旃  
也按御覽引此轉注畧因此以昔入霽韻音細然古人

隨時造語其句偶同昔席或謂昔日講席之所言

安哉之器蓋言飢也 太平御覽李尤有安哉之銘曰

安哉令名甘旨是盛埏埴之巧甄陶所成食彼美珍思  
此鹿鳴則為飲食之器明矣智以古哉與哉載通說文  
飢設飪也从凡从食才讀若載慎之曰見石鼓文考石  
鼓飢𠂔飢北謂載西載北也又考華嶽文作飢古老子  
作飢師飢敦作飢碧落文作飢雲臺碑作飢文有訛異  
或作虛字用然證知說文有本證知哉載飢同音而安



哉之為安覩近是矣黃方陰凌韻書皆未收安哉與仲  
雍之孰哉上古未必如今日佻巧其用哉非才意必是  
載意曰覩者正謂載熟食于器也吳世家注系本云吳  
孰哉居簫籬宋衷曰孰哉仲雍字簫籬今吳之餘暨也  
周禮饗人饗熟食也通作雖雍周語佐雖者嘗焉記雍  
入注厨也則仲雍正取熟食之義為字而孰哉之為孰  
覩又何疑乎

檣盪之檣即臚

說文曰檣

古送切

盪

相庚切

負戴器也正

作𣪠小柩也說文蓋以箱籠為柩落耳今人轉枉去聲  
作𣪠韻會遺𣪠柩曰櫬小棺曰槨窾木為𣪠棺前曰  
和牆曰槨傍 韻會說文櫬棺也引左傳士輿櫬按禮  
柩柩棺柩也漢成紀給槨槨葬埋師古曰小棺也韓安  
國傳槨車相望服虔音衛今作才芮切別作槨穢穗楊  
王孫傳曰堯窾木為𣪠葛藟為緘下不亂泉上不泄殯  
謂棺也周興𣪠𣪠古今則通用𣪠匣𣪠藏之義文選弔  
古冢文見棺前和水經注見胡公棺前和呂覽季歷葬

渦山之尾乘水齧其墓見棺之前和是也蓋謂橫木為  
桓桓和相轉詳見宮室門莊子曰七圍八圍貴人富商  
之家求禪榜者斬之注禪音善司馬曰棺之全一邊者  
謂之禪可為櫛公紹音展蓋如今黃楊木類木細理者  
難大七圍八圍不必此也或曰司馬言全一邊則當音  
單矣智謂禪乃柁之訛檀弓為柁音僻按當讀如坯

器用

鹵薄  
賊事

鈹戟即闌戟攔稍刻攔于首也 史記秦趙良曰持矛

而操闕戟者芻車而趨索隱曰亦作鉞史照音榻三省  
非之當依唐韻音翕智謂古通二音說文鉞音蘇合切  
細鑲金銀為文鉞戟無掌有小橫木鉞挿也本挿車芻  
小戟也考工冶氏注戈今之句子戟或曰雞鳴曰擁頸  
疏據漢法而言符似雞鳴或曰擁腫塞曲也方言戟其  
曲者謂之鉤子鉞符漢書賜單于戲戟十張敞晉東宮  
舊事門各笮雞鳴戟十張此又一敞也平子東都賦  
闕戟轆轤薛綜曰四戟函車邊張協有手戟銘皆是也

爆稍者大駕出金吾將軍執爆稍騎棒以黃金塗以扈  
蹕開元禮儀鎧形如劔而三双連柄共長三尺五寸虎  
豹皮為袋其製起秦漢李綽輦下記曰取爾雅爆牛牴  
觸百獸之象伏內有爆稍庫刻爆牛首于上宋八稍安  
朝堂行禮以前導其夾大將軍者亦名衛司爆稍从矛  
爆字字書不載開寶禮作爆宋景文筆記云刻犁牛犂  
即爆也朱先家又作爆槊今亦有之但用木飾凡鹵簿  
儀刀儀鎧儀鉞皆木為之鎧鉞屬起秦漢唐用為儀仗

爆稍之爆諸家解作擊聲此解殊失今人不擊也立春  
稍啟之舞則有擊聲耳

髦眊以羽飾于障也

髦

昌兩切

眊

仍吏切

廣韻專指鷩毛

其實凡羽皆髦也唐有六色髦孔雀鸚鵡鷩雞毛等髦貶  
損格禁朔眊孔雀白髦宋志髦緝烏羽今為四角小蓋  
繡雲龍孔雀白鵝隋時鶴自拔髦毛是也儀鉞有眊劉  
裕遣白直隊主丁旰渡北岸事畢豎一白眊李叔明獻  
孔雀眊今人大帽上係鷩翎即髦眊也爾雅注江東取

白頭翅背上長翰毛以為曉矚名曰白露纓

擁扇大障扇也

百官皆有鹵簿在京亦有之王導辭

鼓蓋王儉鳴笳列騶南朝御史中丞建康令皆有鹵簿

王僧孺傳遇中丞鹵簿又避中丞赤棒褚淵入朝腰扇

障日有士笑之顏籀正俗匡謬有擁扇正今行路所擁

者南史諸王鄣扇不得雉尾尤射日報以承澤二又曰

貴以追捫繆襲注曰皆實扇名今京官不敢張蓋用舄

事惟見任者四品以上開甘蔗棍五品以上前導安籠

或交牀持障日扇而已即古所謂腰扇擁扇也四品以上扇始帖片金五品京堂入朝掌扇帖金詞林開坊五品則大小扇皆金紅安籠五品以下別衙門則持手扇障日以竹織者其曰扇篋見禮儀內有曰俾倪扇即方圍諸扇見釋詁內

勘箭如古之勘契也 鹵簿有勘箭其牡謂之雄牡箭牝謂之闕仗箭沈括曰如古之勘契也熙寧中罷之澠水燕談曰以劄為箭鏤金緘以泥金絳囊刻檀為魚又



為坎以容曰勘契

以油囊韜祭戟曰油戟

後志公以下至三百石縣長

二人帶劔持祭戟捷弓韜九韜古今注曰及前驅之器

也木為之後代刻偽無復典制以赤油囊韜之謂之油


戟王公以下通用之以前驅西京賦武庫禁兵設在蘭

錡即韜祭也劉宋志皇太子夜開諸門墨令銀字祭以

傳信王曇首傳開門須白虎幡銀字祭此亦有衣之戟

也唐有門戟廟社宮殿門二十四乘宮門十八一品門

十六二品及京兆大都督大都護門十四三品及上中  
都督上都護上州之門十二下都督都護中下州各十  
崔琳與弟珪瑤俱列榮戟號三戟崔家張儉五弟五戟  
號五戟張家李愿父子賜戟韋綏為山南帥請門戟十  
二以行今之百官職事有錫稍以皮為衣自縣令以上  
皆用前驅即榮戟之遺也秦之引漢雜事郭躬謂竇固  
曰漢制假榮戟以當斧鉞今節鉞乃有旗牌乃得斬人  
趙凡夫言錫稍與釋氏錫杖皆誤為錫竟以錫為之



通雅卷三十四